

攻
媿
集

三

攻媿集卷四十八

宋樓鑰撰

內制

明堂禮畢告謝五嶽四瀆祝文原集此首前有告謝天慶觀青詞

滿散朱表今刪

伏以祇奉慈謨親行大饗多儀既備景貺孔昭實惟山川之靈陰相馨香之薦尚款誠悃滋介純禱

明堂禮畢祭謝五嶽四海四瀆祝文

伏以肇祀合宮告成熙事惟二儀祖宗之禮皆已備修凡五岳河海之神悉均望祭雖靈祠之尚遠顧虔報之敢稽

明堂禮畢奏謝諸陵表文

原集此首後有瑞慶節建康府茅山崇禧觀啓建祝壽道場青詞滿散朱表今刪

伏以嗣歷云初奉先爲大適三歲當郊之際祇薦總章惟列聖在天之靈俯垂陰佑雖潔齋之粗備懼誠悃之未孚高厚顧歆神明來格既訖成于熙事敢恭布于深衷遙望陵宮不勝感涕

安穆安恭皇后改謚告太廟祝文

伏以仰惟烈祖將祔太官易別廟之舊稱從成孝之尊謚先期以告英鑒其臨

大行至尊壽皇聖帝靈座祝文

伏以集百官于南郊首定稱天之謚奉二后于太室改從祔廟之名將舉盛儀敢伸昭告

奉上孝宗皇帝謚冊寶成穆成恭皇后改謚冊寶

奏告天地社稷十神太一祝文原集此首前有瑞慶節滿散道場青詞滿散朱表瑞慶節

瑞慶節滿散道場青詞滿散朱表又此首後有天慶觀報恩光孝觀青詞太上皇帝本命萬壽觀設醮青詞滿散朱表今並刪

伏以壽皇卽遠方定于尊稱祖后俱從當更于舊謚將嚴寶冊敢告神祇

孝宗皇帝謚號下日改換銘旌奏告祝文

伏以烈祖在天南郊定謚既遵節惠之典載飭神明之旌仰惟威靈俯鑒誠恪

孝宗皇帝機宮神園除去鋪屋窠木等奏告昭慈

聖獻皇后承祐永思陵祝文

伏以皇祖上仙期方臨于七月稽山庀役地實近于諸

陵暫撤微廬稍開宰木懼有驚于神御敢先叩于威靈
仰冀洪慈俯加陰佑

孝宗皇帝祔廟修製祔室太廟殿宇廊廡權奉安

祖宗神主于初獻應時前奏告祝文

伏以仰尊烈祖將祔太宮奉二代之宗祧飾累朝之祔
室暫遷神主敢告威靈

權奉安神主祝文

伏以崇飾太宮奉遷神主少寓齋居之遂以須祔室之
成敢冀憑依用伸虔告

祭祀太廟土地祝文

伏以修崇清廟升祔孝宗念斤斧之交興懼神祇之或
聳敢先昭告願相多儀

閔仲續康伯修奉櫨宮傳宣撫問并賜銀合茶藥
及賜賜一行官吏工匠等犒設口宣

有敕卿等視役山陵宣勤夙夜勞風寒之匿薄頒若劑
之珍芳好賜有差工徒無怠

孝宗皇帝梓宮發引祝文

敢櫨

伏以阜陵既飭靈駕將行遂從禹穴之藏式啓商楹之
殯攀號何及昭告宜先

前夕日初昏奏告

伏以奄窆有期念終天之永訣靈輿卽遠痛詰旦之將
行重惜分陰采增孺慕

發引時前祭告

伏以六紼有行九京寢遠追念抱孫之受阻伸臨穴之
勤少駐須臾不勝哀殯

啓奠行禮

伏以於穆孝宗將趨神穴爰諏穀旦肅引靈輶顧挽紼
以難留遂遵途而卽遠音容愈邈慟哭何堪

祖奠行禮

伏以陵宮旣備愴我祖之何之紼翼敢行痛仙游之不
返拊龍輶而永訣駕鯨浪以遂東祖祭是修哀號愈切

下皇堂時前奏告

伏以於皇文祖將就黃塗愴永閔于衣冠痛莫親于兆
域式安玉體絕望天顏

掩櫨畢迎奉御容詣下宮奉安

伏以明明我祖奉窀穸以既安雖離在宮痛威容之愈

邇天顏惟肖神宇具依不勝追遠之悲敢致妥靈之告

孝宗皇帝梓宮發引奏告天地社稷太廟別廟太

一宮祝文

伏以烈祖上賓阜陵告備茲啓敢塗之舊將趨兆域之

藏敢告先期仰祈陰佑

至櫝宮奏告帝后祝文

原集此首前有天慶觀報恩光孝觀青詞此首後有冬至節孝宗皇帝几筵水陸道場齋文皇帝本命萬壽觀青詞滿散朱表今並刪

伏以奉皇祖之敢塗勉襄大事近累朝之兆域敢告威

靈未遑洛邑之歸尚奉會稽之葬仰祈孚佑咸遂妥安

孝宗皇帝虞主自浙江還重華宮鼓吹導引曲

孝宗純孝前聖更何加高蹈處重華丹成仙去龍輶遠

越岸暮山遐波臣先爲捲寒沙來往護靈槎九虞禮舉

神祇樂萬世佑皇家

孝宗皇帝神主自重華宮至太廟附廟鼓吹導引

曲

吾皇盡孝宗廟務崇尊鉅典備彌文巍巍東向開基主

七世祔神孫追思九閭整乾坤環宇慕洪恩從今密邇

高宗室千載事如存

孝宗皇帝虞祭畢卒哭行祭禮祝文

伏以阜陵復土既修易奠之虞班祔有期遂卒無時之

哭仰遵禮典莫究哀悰

孝宗皇帝神主附廟并成穆成恭皇后神主同時

附謁升附奏告祖宗帝后祝文

伏以竣事阜陵既畢九虞之祭寧神祔室實同二后之

升祖宗是依昭穆以序實循禮典敢告威靈

孝宗皇帝附廟樂章

聖人之德無加于孝思皇孝宗履行立教始終純誠非

日笑貌於萬斯年是則是倣

太廟修置太祖至高宗室帝后神主祔室畢工時

前奏告還殿室祝文

伏以班祔孝宗崇新清廟備累朝之祔室奉列聖之神

靈敢告先期冀垂昭格

還殿正奉安祝文

伏以阜陵竣事太室鳩工爰歲禮于宮庭用安靈于宗

祔以享以祀來燕來寧

孝宗皇帝耐廟時前告遷成穆成恭皇后神主詣

幄次權行奉安以俟同時耐謁升耐祝文

伏以阜陵竣事奉神主以卽安宗祏致嚴安柔靈而並耐稍遷還幄將奠太宮惟時之良敢豫以告

孝宗皇帝神主耐廟前二日奏告祝文

原集此首前有太

上皇帝本命太一宮設醮青詞滿散朱表今刪

天地

伏以尊祖禮嚴因山事畢用宏開于宗祏將升耐于靈儀信宿之先潔齋以告仰祈昭鑒永賴孚休

宗廟

伏以於皇文祖既畢安虞爰攷禮于前朝盍妥靈于太室仰瞻列聖敢告先期其永無疆克昌厥後

別廟

伏以惟我孝宗將登清廟設九虞而既畢奉二后以同升永世是承前期敢告

太社太稷

伏以永阜訖功孝宗升耐惟億載萬年之鉅典告九土五穀之明神願鑒先期式垂孚佑

太一宮

伏以烈祖上賓太宮升耐國之大事其敢弗虔天之尊神是當先告冀垂昭格用安威靈

改元慶元奏告昭慈聖獻皇后永祜陵永思陵永

阜陵成穆成恭皇后櫝宮表文

原集此首前有天慶觀報恩光孝

觀青詞今刪

伏以仰奉慈謨勉承丕祚將興嗣歲首議嘉名惟慶歷最為盛時而元祐尤伸公道履端伊邇敷號云初敢告威靈式祈孚佑

改元奏告祝文

原集此首前有皇帝本命萬壽觀設醮青詞滿散朱表今刪

天地

景靈宮天慶觀報恩觀同

伏以續緒何堪改元惟謹稽仁祖致平之盛洎泰陵嗣德之初合取嘉名用綿丕祚敢伸昭告仰冀孚休

宗廟

景靈宮帝后諸陵表文同

伏以承列聖之休謹踰年之制合太宗明皇之號有唐實創于嘉名仰慶歷元祐之時我宋允稱于盛際爰肇新于歲紀敢虔告于威靈

社稷

伏以嗣位承休踰年改號取慶歷元祐之盛期紹重規仰勾龍后稷之神用伸昭告尚祈靈佑益介炎圖

太一宮

伏以嗣歷云初紀年敢後合兩朝之盛爰號慶元告十神之靈用祈福佑尚惟昭鑒永助丕基

上辛祀感生帝以太祖升侑奏告祝文

天地

伏以祀感生之帝蓋已有年侑創業之君始從今日敢伸昭告仰冀孚休

宗廟

伏以推功藝祖既居東向之尊升侑感生茲謹上辛之祀仰瞻列聖豫告先期

社稷

伏以感太微之精風祇大祀推藝祖之烈升侑明神惟社稷之炳靈設豆籩而致告

諸陵諸櫝宮表文

伏以上辛穀旦大旅盛儀爰推立極之功克配感生之祖遶瞻陵域敢告吉期事體至嚴威靈斯鑒

僖祖順祖翼祖宣祖還正殿奉安祝文

伏以新廟是營羣言允協爰卜太宮之右用安四祖之靈敢冀威神式歆典祀

奏告太廟祝文

伏以肇舉盛儀宏開別廟祧僖宣之祀視夾室以尤嚴遷順翼之靈附先公而惟謹仰祈列聖俯鑒忱衷

春分前修飾櫝宮奏告諸陵祝文

伏以歲序流易春陽正中既當雨露之濡益愴宮陵之念繕修惟謹種藝以時敢告先期尚祈昭格

進奉皇太后生辰表詞

原集此首前有太上皇帝本命太一宮設醮青詞

滿散朱表今刪

伏以尊居長樂方歌難老之詩時屆芳春適啓誕彌之節邦家均慶宮壺交欣

中賀

恭惟壽成皇太后殿下德

合坤元心同天大贊淳熙之內治恭儉具孚命菲質以嗣興恩私未報方具游神澹泊玩志清虛益觀過歷之

期坐閱後天之算臣夙承大造獲奉慈顏含飴弄孫咸

仰養任之盛戲綵爲樂惟祈箕翼之年

伏以修蘭亭之禊事方樂春陽上椒殿之壽觴仰尊祖

后壽成皇太后殿下恭願坐膺多福日介脩齡國治家齊合三宮而同慶天長地久見千載之太平

太陽交蝕祭告太社祝文

伏以季春五陽日食于朔側身修行朕不敢怠伐鼓于社彝章具存尚抑羣陰以助陽德

陰雲不見交蝕祭謝祝文

伏以清臺獻占太陽當食引咎自省方切兢兢東方未晞陰雲布濩實惟神賜敢恃天休

孝宗皇帝小祥奏告永阜陵攢宮表詞

原集此首前有皇帝

帝本命萬壽觀設醮青詞滿散朱表太上皇帝本命太一宮設醮青詞滿散朱表又有太一宮祝延太上皇帝聖壽設醮青詞滿散朱表今並刪

伏以念茲皇祖遠驚新穀之升瞻彼阜陵深切高山之仰恭惟尊號皇帝恢宏帝業垂裕孫謀茲當祥練之初敢後馨香之薦馳誠惟謹隕涕無從

改元嘉定奏告祝文

開禧三年十二月

天地景靈宮天慶觀報恩光孝觀

伏以祇奉洪圖寢逾周紀屬時多故欲開嗣歲之祥乃選嘉名用冠新元之首敢伸昭告祈介宏休

宗廟諸陵

伏以承列聖之休方深夕惕紀新元之號式介春祺開景運之亨嘉期武功之耆定仰惟敷佑敢不欽承

太社太稷

伏以爲國家者尤謹于紀年有社稷焉敢稽于歲事仰冀神靈之佑庶開嘉定之期肇易美名爰伸昭告

太一宮

伏以國之大事莫重改元天之尊神當嚴昭告願介亨嘉之會遂成耆定之功益畀多祥以興嗣歲

諸陵攢宮表文

伏以祇奉洪圖寢踰周紀屬時多故欲開嗣歲之祥乃選美名用冠新元之首取商宗嘉定之旨睠武王耆定之功仰冀孚休敢伸虔告

閏四月起居諸帝后表詞

嘉定元年

諸帝旦表

伏爲積分成閏適當孟夏之餘告廟有儀敢飭先王之典恭惟謹號皇帝德參高厚仁及華戎仰賴在天之靈益綿奕世之慶式供嘉薦用妥威神

諸后旦表

伏爲元年建巳閏月定時既當視朔之初爰謹奉先之禮恭惟^{諡號}皇后坤隆厚載世嗣徽音慨莫望于聲容尚永綿于慶羨式修孝敬敢薦馨香

諸帝望表

伏爲閏以正時方謹居門之禮月惟既望敢修朝廟之儀恭惟^{諡號}皇帝澤宸羣黎慶縣百世望僊游而雖邈席丕祚于無疆爰薦孝思用循彝典

諸后望表

伏爲四月維夏閏式紀于歸餘先后在天禮用陳于改望恭惟^{諡號}皇后母儀如在神御卽安永陪衣冠之游用綿宗社之慶奉承思孝奠薦惟馨

洞霄宮徑山天目山龍井祈雨祝文

伏以國方多事所願年豐春夏以來甘澤未足種不入土遺蝗已繁當宁興思旱氣甚廣近雖得雨猶未霈然遣官禱祠齋心以俟庶祈響答三日爲霖大慰九農敢忘伸報

故皇子肅王埴興靈前夕敕祭祭文

嗚呼哀哉頃欣嬪御得此誕育睟盤將設何去之速情之所鍾念念輦蹙苗而不秀無乃太促一奠寓哀往從幽卜

成肅皇后小祥奏告永阜陵櫬宮香表詞

伏以祖后上賓尙想含飴之愛歲華遽易忽驚鑽燧之期遙瞻陵寢之嚴倍切音容之感期已久矣儼追慕以如新練而慨然顧加隆而敢忘肅陳賁炷用表哀誠

雨澤愆期奏告祝文

天地十神太一九宮貴神嶽鎮海濱

伏以早魃爲災間有不免在于今歲利害尤深疆場甫寧流徙未復中外空匱正望有秋屬茲常暘種或未入苟失歲事何以有邦頓慚非涼久蒙敷佑高高在上^{皇地}祇云后俯鑒哀祈三日爲霖庶以活國側身引慝恭俟嘉應

宗廟別廟

伏以時方常暘憂懼實甚種未入土何望收成間有一雨未能霑足齋心致禱靡神不宗在天之靈願垂矜憫有請于帝救此下民沛爲膏澤徧及遐邇迄用康年以

壽國脉

太社太稷雨師雷師風師原集此首後有天
慶觀報恩光孝觀青

謂今刪

伏以社稷與君以民爲重民之司命以食爲天時方多艱仰望一稔久矣不雨雨又復霽傾心禱祈願垂嘉答廣布甘澤普濟羣生報以秋冬其敢不飭

禳蝗祝文

原集此首前有皇帝本命萬壽觀設醮青詞滿散朱表今刪

天地

伏以稼穡維寶方興播種之功蝗蝻爲災備舉禴禳之術雖都城之少靜顧畿甸之尙繁遠邇何殊焦勞則一敢祈上帝地云后土俯念斯民既敷醴神盡屏衆多之害更令田祖益昭秉畀之靈

社稷

伏以禾苗方茂社稷焉依雖旱魃之已驅復飛蝗而爲孽神既職幽冥之事朕不勝宵旰之憂爰致禱祈願垂威格掃螟蟲而無迹庶稼穡之有成

醴神

伏以比以飛蝗之作孽嘗遵故典以祭醴都邑頓清無

非昭答郊圻未免敢怠祈禳惟盡除振振揖揖之災庶幾有蕤蕤芄芃之望

零祀祝文

前一日奏告太宗室

伏以旱魃挺災禱而旣應覆出爲虐其害愈深爰卽紫壇仰祈清昊熙陵之德實配彼天豫告威靈願垂昭格有請于帝蘇此遺黎

上帝

伏以旱氣方隆禱旣如響飛蝗肆孽禳之亦消奈何常暘又以示譴朕實不德民則非辜祇祓郊丘謹修零祀仰祈上帝哀閔下民蚤興雲雷大沛雨澤無有遠邇均被滂沱坐變凶年復成樂歲邦本所繫惟天佑之

太宗

伏以天災流行固知代有今歲之旱尤所弗堪禱雨應期方幸周浹陽居大夏茲焉益驕爰卽泰壇恪修零祭稽諸故典作主侑神曾孫非涼宜致疵癘殃及萬姓實惟焦心在天之靈願垂矜閔亟頒甘澤以迄康年

皇地祇

伏以至哉坤元厚德載物生我百穀以活斯人比雨應
祈種幸入土苗而未秀又復亢陽滌滌山川物意焦灼
國有故典禱旱以雩后土資生敢伸虔告願垂大惠救
使百神三日爲霖溥及萬域以蘇焦槁以致豐登庶幾
有邦可以長保

再奏告宗廟別廟

伏以嶺惟非涼負荷至重常暘之罰乃徧黎元飛蝗未
清雨而復旱投誠列聖威靈在天閔予曾孫以及赤子
亟垂昭格沛以甘霖迄用康年保邦是賴別廟云雨而復旱茲焉致感通

太社太稷嶽鎮海濱五方山林

伏以惟民之生以食爲命聰明正直亦惟相依今茲旱
災日既太甚側身致禱徧于百神仰冀爲霖沛然四治
庶有秋之可望豈嘉報之敢稽

內中禳蝗文

原集此首前有成肅皇后中元節水陸道場齋文今刪

伏以旱魃云初遂致飛蝗之作孽雨師既應不圖遺種
之滋繁遠侵閭楚之疆近集郊關之內遇災是懼惟帝
焉依願救百靈盡除螟蟊之害俯令萬國咸保稻粱之

豐

祈雨感應報謝祝文

天地

伏以涉春以來旱氣甚廣種未入土上下隱憂宵旰齋
心日致忱禱皇皇后帝皇地祇云坤元后土實賜鑒臨曰雨而雨
隨時孚應藝我稷黍寔成小康盡彼萬物不足以報矢
詞告謝少致衷誠

宗廟

伏以亢陽爲災幾害稽事國計所繫無所控祈夙夜投
誠父母先祖敢期上徹在天之靈霖霖滂沱幾無虛日
旱魃退聽良苗勃然所在中熟實踰始望傾心報謝其
敢弗虔

別廟

伏以亢陽已甚嘗致禱祈甘雨以時實爲孚應茲成中
熟獲濟民生幽贊爲多可無致謝

十神太一九宮貴神

伏以民爲邦本食乃民天歲一不登何以爲國頃以旱
甚禱于尊神九宮貴神云如響應聲隨車滂沛肅時雨

若易歎爲豐敢罄謝誠尚求終惠

獄鎮海漬五方山林

伏以國方多事豈堪旱災虔誠禱祠靡神不舉時雨之

降實由山川三日之霖四遠霑足歲事將就虔謝敢稽

太社太稷兩師雷師風師原集此首後有天慶觀報恩光孝觀清

詞今

伏以顧惟菲德致此亢陽仰賴百神鑒予忱禱風雨時

至雷霆疾驅遠邇均霑成此中熟一祈一報敢忘此誠

尚惟居歆益加敷佑

祭告酬神

蟲賊爲災秉畀有資于田祖蝗蝻肆孽掃除實賴于酬

神既隨禱以盡消俄蔽空而復至人心相恐歲事可憂

疑有物以驅之殆非力可及者載修祀事仰叩高靈俾

食葉食心之妖罔存噍類成多黍多稌之慶還保豐登

攻媿集卷四十八

攻媿集卷四十九

宋 樓 鑰 撰

謚議

孝宗皇帝謚議奉敕撰

臣聞帝王之出治豐功茂烈生則著見于天下而其流傳于後世者則待節惠之名要皆取其盛者而傳之文王一怒而安天下非無武也武王告武成而作洪範非無文也取其盛者而傳之則備道全美可以一言定也甚哉孝之大也虞舜之大武王之達自漢歷唐無不謚帝爲孝本朝累聖相承皆用舊典若夫集孝道之大成則未有如大行之盛者也恭惟大行至尊壽皇聖帝繩藝祖之武重光堯之華以天縱之能日新之德臨御天下二十有八載巍巍煌煌不可備述若形容天地繪畫日月則不容無辭方在初潛龍德而隱學衆問辨師教不煩日就月將君德昭著虔摯勞謙共爲子職日趨朝謁威儀雖肅雖莫窺其涯涘而中外屬心天人協應光堯內禪高視唐虞嗣位以來勵精庶政召收故老尊禮元臣臨朝若神待物如春崇節儉以革奢汰之風振紀

綱以起偷惰之習事無小而不察人無微而不記機務雖繁酬酢無壅立法定制動爲後則以科舉爲未盡則立待補之法以蒐遺才以武舉爲未盛則優入仕之級以收智勇年勞並用以裁濫賞而不致于累遷銓闈加嚴以抑任子而又爲之限節改秩必使之作邑謂舉以親民而使之治民御史必取之賢宰謂受人之察而後可察人以周行速化必使試郡而後爲郎以延閣清華必俟有功而後除職監司守將必延見而臨遣癯老昏繆之人不得而隱藏姦賊之吏必窮治而斥逐清介潔廉之士則從而拔用朝士闕官乃除遂無待次之淹要郡留闕選才遂無輕授之冗黜賊吏之世賞進軍功于流內長慮卻顧守之至堅故雖日不暇給而四方靡然向化矣于時疆場未寧戎車方駕激厲將士嚴備邊陲張皇六師明見萬里中原起來蘇之望殊鄰多歸附之民撫而有之還以爲用天威既振戎虜畏讐雖犁庭掃閭未快初志而信使復通減幣殺禮至今無煙火之警苟非雄斷遠畧何以臻此臨政既久治道愈明物來能名事至輒斷精神之運上際于蟠于天地之間智慮所

關六通四闢于帝王之德行公道以銷黨偏之蔽推平心而絕喜怒之私間有水旱之變應天以實而禮文尤備州縣之奏恐其不速蠲復之數恐其不多傾困倒廩以濟其急賞勤罰惰以勵其餘民不知其有凶歲亦隨以登熟幸太學幸秘省廷策貢士布文教以振士風御鞍馬親弓矢申嚴軍法立武事以張國威內外大小之臣無不列之屏以待黜陟山川險要之地無不指諸掌以立防閑治具畢張風化已成方且玩意希夷而無奉道之過游心寂寞而無佞佛之迹作敬天之圖兢懼愈深闡延和之殿諏訪愈切躬講讀之勤設遺補之官其于保治有始有卒至于脫屣萬乘燕居重華授受之際尤爲雍容嗚呼身退而道彌高尊極而用彌儉是宜萬有千歲永處慈辰而厭代登遐歸于帝鄉此羣臣萬姓所以攀號擗踊泣盡而繼之以血也遠日有期恭定尊諡請之南郊以詔萬世謹按諡法曰能官賢才曰哲帝德廣運曰文應變無方曰神保大定功曰武持盈守滿曰成慈惠愛親曰孝迹夫知人而善任使文武各得其用非所謂能官賢才乎修德以來遠人矢文以治四國

非所謂帝德廣運乎酬酢以周萬幾圖回以盡衆智非應變無方乎妙韜略而不用極聰明而不殺非保大定功乎守基圖之廣大延國祚于綿遠非持盈守滿乎若孝道之盛非惟臣子所不能稱贊雖攷之謚法求之六家語其甚盛者曰慈惠愛親而已是則未足以彰大行之孝也報本反始而奉郊禋尊祖敬宗而事廟饗惟高

宗爲天下而得人太皇盡母道以愛子而大行天賦至性不可解于心備四海九州之養謹五日一朝之儀委曲周盡猶恐不及兩宮九閭終無間言固已風動四方震服夷虜高宗屬疾則衣不解帶躬自營藥及棄天下則勺水不入于口倚廬有過于哀鄙漢文之短喪陋晉武之無斷身服苴麻禮盡苫塊行有匹夫之所難哭則哀動于左右鄰使來弔止許朝于喪次顏色之戚哭泣之哀鄰使退而嘆曰皇帝聖孝乃如此大臣或進諭解之言則流涕被面曰大恩難報羣臣感泣莫敢仰視易月之制旣終因山之役旣畢孺慕無已追遠弗勝遂舉大寶以畀聖子不曰倦勤不曰求逸惟曰不得日奉先帝之几筵躬行聖母之定省又曰俾予一人獲遂事親

之心永膺天下之養于是御素服于乘輿尊几筵于內殿退處聖室以終三年之喪哀疚不忘齋潔自若欽事慈福溫清無違嗚呼茲豈非集孝道之大成又豈慈惠愛親之所能盡也大行至尊壽皇聖帝宜天錫之曰哲文神武成孝皇帝廟號孝宗謹議

成穆皇后改諡議

奉敕撰

臣聞帝王之興皆有天命夫婦大倫尤非偶然曰天作之合曰天立厥配正始之道王化之基于是乎在焉矧汾陽大家多爲后族唐室憲宗則有懿安之盛皇朝真廟則有章穆之賢姓系相承是生聖女慶鍾戚開寶胤壽皇生不及褱衣之榮歿而膺寶冊之禮久安別廟將奉太宮宜改尊稱以從帝諡恭惟安穆皇后柔明懿淑慈順溫恭蚤麗王藩克盡婦道設桑弧于門左屢占熊夢之祥帶弓韞于襟前每啓燕祠之瑞云何不淑遽奄九原迫烈祖之御天眷元妃而追冊欲歌流荇傷不見于令姿正號長秋遂疏恩于幽安固已嚴烝嘗之奉崇節惠之名綿慶祚于三朝介洪休于萬世重華厭代方服大喪吉竈因山行當升祔念今日遺弓之痛旣切于

神孫愴昔時故劍之求用承于先志爰因安穆之懿式遵成孝之規謹攷諡法婦德均一曰成德化肅雍曰穆安穆皇后窈窕好逑有關雎之美用心專壹有鴈鳩之德非婦德均一乎孝欽以奉舅姑和平以儀閨門非德化肅雍乎伏請改上諡號曰成穆皇后

成恭皇后改諡議

奉敕撰

臣竊惟至尊壽皇聖帝臨御之初仰奉高皇首隆孝治正家刑國百度具舉而中闔久虛陰教斯闕乃奉親命乃諏卜吉攷正古制閎建長秋安恭皇后淑範懿德冠于後宮君子好逑遂正乎內坤承乾而時行月遡日以爲明禕揄盛服助成九廟之奉櫛縱具禮欽承兩宮之養母儀既尊后德有輝而曾未數歲祔繼椒掖方隆大練之飾終符素柰之祥求賢審官未展周南之志感今懷昔空形宋文之策固已極褒崇之典議安恭之諡祭于別廟迨今二十有八年矣壽皇上賓萬國起號弓之慕孝孫盡禮七月戊因山之役有司奏請定諡南郊二后在天皆應改號以從成孝之名謹攷之諡典曰夙夜警戒曰成謙而好禮曰恭安恭皇后共繭館之職以贊

親耕之勤謹雞鳴之戒以勉相承之道禁切外家不干裏謁茲不曰夙夜警戒乎躬節儉之德服澣濯之衣御貢獻之珍麗遵圖史之箴規茲不曰謙而好禮乎伏請改上諡號曰成恭皇后

劉忠肅公

大中

覆諡議

資正殿學士劉公輔政于紹興七年未幾而薨距今五十有餘年矣中更權臣當國之久故家泯然無聞公又爲趙丞相鼎深知同寅之人尤無敢言者迨今始得出處之詳于行狀太常又明其立朝體國之大節諡以忠肅可謂當矣嗚呼高宗皇帝身濟大業披荆棘而立朝廷一時人物雖經崇觀政宣之摧折靖康建炎之流離而元祐流風猶有存者趙公身任天下之重甄拔人望布滿中外論思勸諫皆極天下選由是王政日修國勢日隆以啟中興是豈惟將帥攘卻之功哉抑聞之趙公入相之初首白高宗必欲得公與王公庶爲執政以自助二人遂竝用方是時君臣上下日夜講求恢復之計外與敵通使而爲備甚飭所謂行在所止爲時巡之謀若不可以一朝居非若後日之晏然于此也公之同心

輔贊力正國本太常之言皆家世舊聞參以記傳炳炳如丹而後公之名益顯望之如神人然公議之不可泯諡法之有益于天下如此可不務哉

王節愍公倫覆諡議

馬或奔蹏而致千里士或以賁俗之累而立功名夫泛駕之馬跡蹏之士亦在御之而已此雖非古先用人之道漢武帝所以能得奇才爲用蓋以此也靖康艱難事出倉猝承平百年衣冠如雲習于久安不知所爲平時經明行修褒衣博帶之士狼狽失守不計其幾至有助桀爲虐忘君賣國不忍言者樞密王公名臣諸孫跌蕩不羈浮湛閭里不見其異一旦慷慨奮發論事激烈抗章敢言欽宗爲之改容擢于布衣待以國士天下方知其爲奇男子也帥府旣建首爲勸進之舉高宗募忠勇之士往使不測之敵罔有徇死以行者惟公機智勇辯氣吞豪酋往來再三忠肝義膽折服倔強和議之成爲力最多公之志蓋朱已也故每當陛辭必以乘機用兵爲請勿復以臣爲意此其志豈止于和戎哉再使被留音問斷絕誘以高爵而不就脅以嚴誅而不懼引義南

向仗劍以死郡邑爲之震動至畫像而祠之同視小廉之士其能以忠徇國視死如歸如公者寡矣太常易名曰節曰愍無可議者傳之來世抑以見取士之無方不應以細故而棄才也

楊惠懿公便覆諡議

諡所以易名也法苟應諡雖功烈不見于世亦必隨其人之所宜而稱之此孔文子之所以爲文也故特贈光祿大夫少傅楊公某生長富貴不知天下之憂患而抗志不羣篤志問學隆師親友嗜書好古若有不能自己者古人以公子而厲布衣之操者公實近之已而游太學擢上第優游都城以致顯位是時四方無事朝廷尊安周旋清華尤無以自見于事然因所職而建言類老于世故者自詭治民休有惠愛晚登禁途益有志于效忠孜孜論思時見一二不幸所蘊未伸天不假之年而遽忽焉惜乎未見其止也官簿已高一贈而至光祿禮官卽其已行者揆之以法諡以惠懿得其實矣尚何異辭

攻媿集卷五十

宋樓鑰撰

進故事

唐鑑

李絳對憲宗曰人臣死生繫人主喜怒敢發口以諫者有幾就有諫者皆晝度夜思朝刪暮減比得上達十無

二三故人主孜孜求諫猶懼不至況罪之乎帝善其言

舊唐書李絳傳不載此新唐書載絳見浴室殿帝曰此諫官多朋黨論奏不實皆陷謗訕欲無其尤者若何絳曰此非陛下意必儉人以此警誤上心自古納諫昌拒諫亡夫入臣進言于上豈易哉君尊如天臣卑如地加有雷霆之威彼晝度夜思始欲陳十事俄而去五六及將以聞則又憚而創其半故上達者纔十二何哉干不測之禍顧身無利耳雖開納獎勵尙恐不至今乃欲誣訶之使直士杜口非社稷利也帝曰非卿言我不知云云與此大意同而詳約有異帝謂宰相曰太宗以神聖之資羣臣進諫者猶往覆數四況朕寡昧自今事有違宜卿當十論毋但一二而已

舊唐書憲宗本紀元和二年十二月丙辰上謂宰相曰朕覽國書見文皇帝行事少有过差諫臣論諍往復數四况朕之寡昧涉道未明今後事或未當卿等每事十論不可一二而止與此無異意而語句不盡同臣嘗謂近古敢言者在唐太宗時無如魏徵太宗嘗賞其直言徵對曰陛下導臣使言所以敢爾不然臣敢數

批逆鱗哉在憲宗時無如李絳而絳之言如此不惟曲盡人臣之情蓋亦躬自蹈之而後能言之以此知一介之臣敢言于人主之前者至鮮惟在人主有以導之憲宗有意貞觀之治

原集因避宋仁宗諱魏徵作魏謩貞觀作正觀今就更正謂事有違宜卿當十論毋但一二而已絳既能開廣帝意憲宗又能勵其羣臣如此中興唐祚不在茲乎仰惟陛下和顏聽言好善忘勢凡有奏對無不俯納臣密侍清光實親見之而臣猶援憲宗李絳之言者蓋當國家閒暇人心易弛朝廷之上罕聞直聲又自聖躬康復以來羣臣深恐仰勞聽覽奏事不敢遲久言而簡切固不在多第恐相習成風各務省事朝刪暮減恐無二三情實不輸事理不究羣臣苟免煩瀆之過陛下因謂無事可言私憂過計昧死陳述願陛下厲太宗憲宗之志俾廷臣竭魏徵李絳之忠知無不言言無不盡上下交泰以興治功聖度優容擇其可用者力行之顧何事之不濟哉竊見陛下視朝之際宰輔奏事已久亦難以坐至日晏壽皇在御之日多子進膳之後便殿引見臣寮得以從容詢訪此實陛下家法可舉而行也

資治通鑑

武德九年今據資治通鑑改正房玄齡言秦府舊人

未遷官者皆嗟怨曰吾屬奉事左右幾何年矣今除官

反出前宮齊府人之後太宗曰王者至公無私故能服

天下之心朕與卿輩日所衣食皆取諸民者也故設官

分職以爲民也當擇賢才而用之豈以新舊爲先後哉

新而賢舊而不肖安可舍新而取舊乎今不論其賢不

肖而直言嗟怨豈爲政之體乎

貞觀元年或上言秦府舊兵宜盡除武職進入宿衛舊本說追今據資治通鑑改正

太宗謂之曰朕以天下爲家惟賢是與

豈舊兵之外皆無可信者乎汝之此意非所以廣朕德

于天下也

三年濮州刺史龐相壽坐貪污解任自陳嘗在秦王幕

府上憐之欲聽還舊任魏徵諫曰秦府左右中外甚多

恐人人皆恃私恩是使爲善者懼上欣然納之謂相壽

曰我昔爲秦王乃一府之主今居大位乃四海之主不

得獨私故人大臣所執如是朕何敢違賜帛遣之相壽

流涕而去

九年岷州都督高甌生坐減死徙邊或言甌生秦府功

臣寬其罪太宗曰甌生建李靖節度又誣其反此而可

寬法將安施且國家自起晉陽功臣多矣甌生獲免則

人人犯法安可復禁乎我于舊勲未嘗忘也爲此不敢

赦耳

臣聞書曰官不及私昵惟其賢爵罔及惡德惟其能蓋

官爵者天下之公器人主所以厲世摩鈍奔走天下而

天下爲之服役者以其用之公也唐太宗由秦王嗣位

其平日陪從于左右者往往經百戰之餘冒矢石犯霜

露出萬死而得一生及見興王之盛者蓋無幾也太宗

以至公爲心雖有故人舊勲而求遷官者未始輕予所

入衛者不肯偏用至于坐貪者雖憐之而終遣之去犯

法者雖不忘而終不敢赦惟其見之明而行之果是以

能成貞觀之治本朝列聖故事一一可攷陛下毓德春

宮之久攀附之人官之祿之其人甚多旣歷四年而振

授求請今猶未已動煩宸衷曲爲區處臣願陛下遠鑒

文皇之公心近遵列聖之定法裁抑僥倖使各安分而

退聽則外此而妄求者亦當息心朝政清明非爲小補